

ARUBA MERECE



MOVIMIENTO ARUBANO SOBERANO

PLAN DI PARTIDO 2025 -2029
ELECCION 2024

“Aruba Merece MAS”

Lider di Partido MAS
drs. Marisol J. Tromp



Contenido

Introduccion	01
Pa Un Aruba Fuerte, Husto y Sostenibel -MAS 2024	03
Bon Gobernacion y Transparencia pa un Aruba Liber di Corupcion	05
Atende Retonan Social na Scolnan y den Comunidad	07
Cuido y Bienestar pa un Aruba Saludabel	09
Cuido y Bienestar pa Nos Grandinan	11
Cuido y Bienestar di Nos Animalnan	14
Modernisacion di Enseñansa na Aruba	15
Resistencia di Medio Ambiente y Sostenibilidad	18
Diversificacion Economico y Turismo	20
Profesionalismo den Instancianan Gubernamental	22
Empleo y Seguridad Social	24
Infraestructura Sostenibel	27
Agricultura Sostenibel y Suministro di Alimento pa Aruba	29
Finalmente: Hunto Padilanti pa un Aruba Saludabel, Prospero y Sostenibel	31

Prologo



Aruba ta na antesala di eleccion y, pues, ta importante pa refleha riba e pakico nos ta bay vota. Nos ta vota pa un Parlamento cu como representante di pueblo tin e tarea pa eherce control riba gobierno, traha ley, controla gobierno segun principionan di bon gobernacion, cumpli y respeta leyman existente di nos pais y proteha derechonan humano.

Dia 13 di november 2020, Minister-President a firma un acuerdo cu Hulanda, den nomber di Gabinete Wever-Croes, pa ehecucion di un landspakket. E rumbo nobo aki pa pais Aruba ta un realidad cu no por wordo cambia. E focus di e landspakket ta riba tereno di maneho financiero, gastonan y efectividad di sector publico, sector financiero, economia, cuidado, enseñansa y fortificacion di nos estado di derecho. E acuerdonan concreto haci entre Aruba cu Hulanda ta para den un agenda di ehecucion cu ya caba ta den ehecucion.

Pa e motibo aki, Partido MAS ta bin cu un programa di partido REALISTICO Y EHECUTABEL, teniendo cuenta cu e diferente puntonan menciona den e landspakket. Ademá, e programa di metanan mundial pa desaroyo sostenibel (SDG's) basa riba principionan di transparencia, responsabilidad, influencia riba maneho y derechonan humano lo forma un compas importante den e programa aki pa un Aruba sostenibel.

Si nos forma un unidad, nos ta bay dilanti pa hunto forma un Aruba husto, LIBER DI CORUPCION, pero cu ta ofrece BIENESTAR na un y tur cu ta biba aki. Y unda nos tur ta haya e chens pa disfruta di un miho calidad di bida y unda RESPET tanto den nos comunidad como den Reino, ta regresa.

drs. Marisol J. Tromp
Lider di Partido MAS

Introduccion



Aruba ta na un crusada. Nos futuro ta wordo forma pa e decisionnan cu nos ta tuma awe, y MAS ta determina pa delinea un rumbo cu ta hiba na un isla mas fuerte, mas husto y mas sostenibel. Nos ta kere cu politica mester ta den servicio di pueblo, y cu tur Arubiano – di hoben te bieu – merece un oportunidad igual pa desaroya nan mes y hiba un bida valioso. Alavez MAS ta kere den un relacion di cooperacion y respet den reino hulandes. E plan di partido aki ta ofrece un vision cla y ehecutabel pa enfrenta e retonan cu nos isla ta confronta y probecha e oportunidadnan cu ta presenta.



Un Futuro Sostenibel pa Un y Tur

MAS ta boga pa un crecemento economico cu no ta exclui ningun hende, un base social riba cual tur hende por construi y un gobierno cu ta actua transparente y honesto. Nos ta comprometi na un sociedad unda tur hende por participa, sin importa nan origen, genero of status socio-economico. Nos balornan principal ta basa riba husticia social, solidaridad y sostenibilidad. Nos ta convenci cu un sociedad husto y inclusivo ta e clave pa un progreso duradero.

Nos Metanan y Prioridadnan Principal:

1. Bienestar y Salud pa Un y Tur

Cuido medico accesibel y di calidad no ta un luho, sino un derecho pa tur ciudadano. Nos ta compromete na cuida preventivo, un miho acceso na cuida di salud mental y sosten pa gruponan vulnerabel manera nos grandinan y muchanan. Salud y bienestar ta forma e base di un sociedad fuerte.

2. Un Economia Husto y Sostenibel

Aruba mester bira menos dependiente di un solo sector economico. P'esey nos ta boga pa diversificacion y innovacion, cu un enfasis fuerte riba energia renobabel, tecnologia y agricultura. Door di amplia e base economico, nos ta crea oportunidad pa un y tur y ta construi un futuro resiliente.

3. Proteccion di Nos Naturalesa y Medio Ambiente

Nos naturalesa unico ta un tesoro precioso cu nos mester proteha pa futuro generacionnan. MAS ta boga pa un maneho sostenibel cu ta balansa crecemento economico cu conservacion di medio ambiente. Leynan ambiental estricto y inversionnan den tecnologianan berde ta garantisa cu nos rikesanan natural ta keda preserva.

4. Gobernacion Transparente y Liber di Corupcion

Corupcion ta mina e confiansa den gobierno y ta perhudica sociedad den su totalidad. MAS ta para pa un gobierno habri y honesto, unda transparencia y responsabilidad ta central. Nos ta boga pa leyman mas estricto contra corupcion, proteccion di denunciante (klokkenluiders) y mecanismonan di control independiente.

5. Seguridad Social y Empleo

Cada individuo mester haya e oportunidad pa contribui na sociedad. Nos kier fortifica empleo y seguridad social door di duna prioridad na trahadonan local, promove condicionnan laboral flexibel y haci vivienda y costo di bida pagabel y accesibel pa un y tur.

Nos Compromiso

MAS ta compromete na un Aruba unda tur hende ta sinti nan mes scucha y balora. Nos ta kere den un sociedad unda respet, igualdad y sostenibilidad ta e norma. Cu e plan aki nos kier demostra cu un miho futuro ta posibel. Hunto nos por construi un Aruba unda tur hende por crece, florece y contribui na un isla fuerte, husto y sostenibel.

drs. Marisol J. Tromp

Lider di Partido MAS

“Pa Un Aruba Fuerte, Husto y Sostenibel” - MAS 2024

Pa nos partido, MAS, tin cuater reto importante y urgente cu nos kier atende den e siguiente periodo di gobernacion: admision y integracion di migrantenan, determinacion di e capacidad di carga di nos pais, combatimento di corrupcion, y proteccion di nos naturalesa y economia. Aki bou nos ta elabora riba e retonan aki y nos puntonan di bista.

1. Admision y Integracion di Migrante

E maneho di migracion pa Aruba ta un reto grandi cu ta exige reglanan cla y proteccion di e comunidad local. Door di e fluho di migrantenan, hopi biaha pa yena buracunan den mercado laboral, ta bin un presion extra riba nos infraestructura, cuido medico, enseñansa y medio ambiente. E maneho actual ta permiti demasiado migrante sin suficiente regulacion, loke ta conduci na problemanan. P’esey MAS ta boga pa un maneho di migracion controla cu ta tene cuenta cu e capacidad di carga di nos pais y ta duna prioridad na bienestar di e poblacion local.

Maneho di Migracion Controla pa un Aruba Mas Fuerte

Nos enfoque di migracion ta dirigi riba yena vacaturanan cu forsa laboral local. Unda esaki no ta posibel, trahadonan di afo ta wordo admitti bou di condicionnan estricto. E maneho aki ta percura pa un uzo controla di e capacidad di carga di Aruba y ta duna prioridad na e bienestar di e poblacion local.

2. E Capacidad di Carga di Aruba (Carrying Capacity)

Un di e preguntanan mas grandi cu Aruba tin cu confronta ta con leu nos kier crece. Aruba tin espacio limita, y nos mester tuma decisionnan tocante e futuro di nos pais. Nos kier ta un pais cu un poblacion creciente di kisas mey miyon habitante? Of nos kier ta un pais cu ta crece den forma controla y ta ofrece espacio pa nos profesionalnan hoben regresa, traha y contribui na e progreso di nos pais? MAS kier pa gobierno desaroya un vision cla riba cuanto crecemento nos pais por carga. Asina cu esaki ta cla, nos por atende problemanan den enseñansa, cuido medico, naturalesa y otro sectornan den un miho forma.

“Pa Un Aruba Fuerte, Husto y Sostenibel” - MAS 2024

3. Combatimento di Corupcion

Corupcion ta sigui ta un reto grandi den gobierno y institutonan relaciona. Rapportnan di Controlaria General ta muestra e magnitud di e problema. Pero nos ta kere cu ta posibel pa combati corupcion efectivamente. MAS ta compromete na un gobierno transparente y integro unda tumamento di decision ta sosode den forma habri y honesto, pa asina restaura e confiansa di ciudadanonan den gobierno.

4. Proteccion di nos Naturalesa y Economia

E presion di turismo riba Aruba, hunto cu uzo intensivo di nos naturalesa y espacionan publico, ta causa deterioro y daño. Pensa por ehempel riba 'turismo di aventura', cu tin un impacto grandi riba nos flora y fauna. Sin reglanan cla y proteccion, nos recursonan natural ta sufri, loke ironicamente ta e motibonan pakico turistanan ta bin Aruba. Pa evita esaki, mester bin leyman estricto pa proteha nos naturalesa y medio ambiente, sin duda pa tuma decisionnan dificil.

MAS ta boga pa un maneho sostenibel cu ta balansa tanto crecemento economico como conservacion di naturalesa. Solamente asina nos por conserva nos pais pa futuro generacionnan y ofrece un miho calidad di bida na tur hende riba Aruba.

Bon Gobernacion y Transparencia pa un Aruba Liber di Corupcion

MAS ta compromete na un gobernacion transparente y honesto. Nos ta kere cu e lucha contra corupcion ta cuminsa cu un gobierno cu ta habri tocante con decisionnan ta wordo tuma y con placa publico ta wordo gasta. Nos partido kier sigura cu funcionarionan publico ta responsabilisa nan mes na comunidad, cu fondonan publico ta wordo uza di un manera corecto, y cu cada ciudadano ta wordo proteha di igual manera. Door di pone enfasis riba integridad y responsabilidad, nos kier restaura e confiansa den gobierno y crea un sistema cu ta trata tur hende husto.

Pakico Combati Corupcion?

Corupcion ta afecta tur hende. E ta percura cu placa publico ta disparce, e ta daña e confiansa den gobierno y ta mantene pobresa y desigualdad. En bes di sirbi e interes general, interesnan personal ta wordo faboreci. Corupcion ta debilita nos economia, ta mina husticia y ta kita servicionan esencial di e hendenan cu mas mester di nan. MAS kier caba cu corupcion, pa asina recursonan wordo reparti husto, decisionnan wordo tuma na un manera husto y tur hende haya oportunidadnan igual. Cu un posicion firme contra corupcion, nos ta traha pa un futuro mas fuerte, mas husto y mas prospero pa tur hende riba Aruba.

Con Nos Kier Haci un Diferencia

MAS kier, cu e pasonan concreto aki, no solamente elimina corupcion, pero tambe percura pa un gobierno den cual tur hende por tin confiansa. Nos ta boga pa un reparticion husto di recursonan, mas frankesa den tumamento di decision y un gobierno transparente cu ta sirbi tur ciudadano. Hunto nos ta construi un Aruba husto, fuerte y prospero pa un y tur.

Bon Gobernacion y Transparencia pa un Aruba Liber di Corupcion

Nos Puntonan di Accion pa un Gobierno Liber di Corupcion:

- 1. Mas transparencia y frankesa:** Tur ciudadano mester tin acceso na informacion tocante con gobierno ta funciona.
- 2. Leynan mas estricto contra corupcion:** Nos kier leyman nobo y mas skerpi pa preveni y combati corupcion.
- 3. Proteccion di denunciante (klokkenluiders):** Hendenan cu ta raporta actonan robes mester por haci esaki den forma sigur y protegi.
- 4. Controlnan independiente:** Mester tin supervision regular y independiente riba gobierno y con e ta maneha placa.
- 5. Nomenclatura a base di merito:** Liderman den gobierno mester wordo scogi a base di nan capacidadnan, no door di 'friends and family'.
- 6. Tumamento di decision habri:** Secrecia den tumamento di decision mester keda limita; ciudadanonan tin derecho di sa kico ta pasando.
- 7. Digitalisacion di servicionan di gobierno:** Door di automatiza procesonan, nos ta reduci e chens di corupcion y tur cos ta bira mas transparente.
- 8. Training y etica pa funcionarionan publico:** Personal di gobierno mester wordo entrena den actua honesto y etico.
- 9. Mas participacion di ciudadano:** Ciudadanonan mester tin e posibilidad pa observa y supervisa.
- 10. Establecimiento di instancianan anti-corupcion independiente:** E organonan aki mester por investiga actonan robes y sigura cu tur hende ta tene nan mes na e reglanan.



Atende Retonan Social na Scolnan y den Comunidad

MAS ta reconoce cu problemanan social, manera abuso sexual, pobresa, problemanan psicologico y criminalidad hubenil, tin un impacto directo riba e futuro di nos sociedad. P'esey nos kier sigura cu scolnan no ta solamente un luga pa siña, pero tambe pa proteha y sostene nos hobennan. Ata e accionnan cu nos kier tuma:

1. Ayudo Social Permanente na Scolnan

Nos partido ta boga pa e implementacion di trahadonan social na scolnan. E profesionalnan aki lo sostene studiantenan continuamente y reacciona directamente riba problemanan social cu presenta. Esaki ta yuda pa atende problemanan tempran y pa e desaroyo pa e alumnonan.

2. Ayudo Psicologico Accesibel

MAS kier pa servicionan psicologico bira mas accesibel. Esaki ta nifica mas ayudo subsidia, posibilidadnan pa bishitanan 'walk-in' sin tempo di espera largo, y mas sosten pa esnan cu mester di dje. Ayudo psicologico mester ta disponibel pa tur hende, sin obstaculo.

3. Inspeccion di Voogdijraad

E proteccion di mucha- y hobennan ta merece nos atencion completo. P'esey nos kier inicia un inspeccion di Voogdijraad pa wak si e servicionan ofreci ta suficiente y unda por mehora. Nos muchanan merece e miho cuido y proteccion.

4. Fortificacion di Cuido di Adiccion

Adiccion por destrui famianan y comunidadnan. Nos kier pone mas recurso disponibel pa fundacionnan cu ta atende problematica di adiccion y ta ofrece e sosten y continuo. Kibra e circulo vicioso di adiccion ta esencial pa un sociedad mas saludabel.

Atende Retonan Social na Scolnan y den Comunidad

5. Programanan Extracurricular Gratis of Pagabel

Pa ofrece hobennan un manera positivo pa pasa nan tempo y tene nan leu di influencianan negativo, nos kier traha hunto cu comunidad pa programanan despues di scol gratis of parcialmente gratis. Esaki ta reduci e chens di criminalidad hubenil y ta yuda hobennan crece den un ambiente sigur. Por pensa riba deporte, arte, actividadnan educativo y guia cu huiswerk.

6. Atencion na personanan cu limitacion mental y fisicamente

MAS lo pone atencion riba e grupo di personnan cu limitacion pa asina por crea un comunidad unda personan cu limitacion tambe por ta inclui den comunidad, den e area laboral y area di educacion. MAS lo pone atencion pa mehora e infraestructura y participacion general pa e grupo y asina percura pa tin igualdad den nos pueblo.

Cu e enfoque aki, MAS kier contribui na un futuro unda problemanan social ta wordo atendi efectivamente y hobennan ta sinti nan mes sigur y sostene. Fortifica e resistencia social, modernisa enseñansa y ofrece oportunidad pa un y tur ta central den esaki. Asina nos ta construi hunto un Aruba mas fuerte y miho.



Cuido y Bienestar pa un Aruba Saludabel

MAS ta boga pa un sociedad unda e salud y bienestar di tur habitante di Aruba ta central. Door di inverti den cuida preventivo, cuida medico accesibel, y programanan di bienestar nos ta traha pa un futuro unda tur hende tin oportunidadnan igual pa biba saludabel y feliz.

1. Educacion di Salud y Prevencion

- **Campañanan di Informacion Dirigi:** Nos ta enfoca riba campañanan di informacion tocante habitonan di bida saludabel, alimentacion, movecion y prevencion di malesanan, pa asina ciudadanonan por tuma decisionnan mas informa pa nan salud.
- **Cuido Preventivo:** Fortificacion di programanan di cuida preventivo pa detecta y trata malesanan tempran, reduciendo asina e presion riba e sistema di cuida medico.

2. Cuido Accesibel y Pagabel

- **Acceso Igual na Cuido:** Nos ta boga pa cuida cu ta accesibel y pagabel pa tur hende, sin importa entrada, edad of antecedente.
- **Cuido di Salud Mental:** Mas atencion y recurso pa cuida di salud mental, cu acceso mas rapido na ayudo psicologico y psiquiatrico.
- **Aumento di Calidad di Cuido:** Mehora e calidad di cuida door di training continuo y profesionalisacion di personal di cuida.

3. Salud y Enseñansa

- **Educacion di Salud den Scolnan:** Integracion di educacion di salud y bienestar den e curiculo di scolnan basico y secundario, pa asina muchanan siña for di un edad hoben tocante un estilo di bida saludabel.
- **Cooperacion cu Comunidadnan:** Den cooperacion cu comunidadnan local nos ta percura pa programanan cu ta promove salud y bienestar, manera actividadnan deportivo, alimentacion saludabel y sesionnan educativo.

Cuido y Bienestar pa un Aruba Saludabel

4. Cuido pa Nos Grandinan y Gruponan Vulnerabel

- **Sosten di Cuido di Nos Grandinan:** Mehoracion di e calidad di cuidu di nos grandinan door di recursonan adicional pa enfermeria, facilidadnan di cuidu y dunadonan di cuidu informal (mantelzorgers).
- **Proteccion di Gruponan Vulnerabel:** Programanan specifico pa gruponan vulnerabel den poblacion pa sostene nan cu servicio di cuidu y bienestar.

5. Innovacion y Eficiencia den Cuido

- **Cuido Digital y Tecnologia:** Inverti den solucionnan tecnologico pa cuidu, manera filenan digital di pacient, pa mehora e eficiencia y accesibilidad di cuidu.
- **Cooperacion cu Institutonan di Cuido:** Aliansanan cu institutonan di cuidu pa desaroya y implementa solucionnan di cuidu innovativo, dirigi riba un poblacion mas saludabel.

MAS ta kere cu salud y bienestar ta forma e base pa un sociedad fuerte y resiliente. Door di inverti den prevencion, cuidu, y bienestar nos ta traha na un futuro unda tur hende ta sinti nan mes saludabel, sigur y sostene. Hunto nos ta construi un Aruba saludabel pa un y tur.





Cuido y Bienestar pa Nos Grandinan

Nos grandinan a contribui pa hopi aña na e construccion di nos comunidad. Awor ta nos responsabilidad pa sigura cu nan por hiba un bida digno, independiente y prospero, cu acceso na cuidu eficiente y amoroso. MAS ta kere cu esaki ta nan derecho y nos deber. Mirando e envehecimento di nos poblacion, cu ta premira di yega casi 30% di 60-plus na 2040, ta crucial pa construi un sistema di cuidu sostenibel cu ta enfoca riba mantene autonomia, dignidad y salud di nos grandinan.

1. Prosperidad y Sosten pa Nos Grandinan

- **Beneficianan Fiscal pa Grandinan Trahado:** MAS kier introduci un reduccion di impuesto pa grandinan cu ta sigui traha, pa nan por sigui haci un contribucion valioso na e mercado laboral.
- **Tarifanan Social pa Utilidadnan:** Nos ta investiga e posibilidad pa introduci tarifanan mas abou pa awa y coriente pa grandinan cu un entrada limita, pa nan por biba pagabel.
- **Cubri Gastonan di Remedi door di AZV:** MAS ta compromete pa e gastonan di remedi pa grandinan wordo cubri completamente door di AZV.
- **Proteccion contra Aumento di Huur:** Ora aumento di e uitkering di AOV tuma luga door di inflacion, grandinan mester wordo proteha contra aumento di prijs di huur di casnan social.

2. Calidad di Cuido y Sosten

- **Cuido Mehora den Casnan di Cuido:** MAS kier garantisa e calidad di cuidu den casnan di cuidu door di personal bon capacita, infraestructura moderno, programanan di actividad y controlnan di higiena estricto.
- **Revision di Subsidio pa Institutonan di Cuido:** Nos kier revisa e condicionnan di subsidio pa institutonan di cuidu, pa nan por ofrece miho cuidu.
- **Cuido Psicologico den Pakete Basico di AZV:** Mirando e aumento di problemanan di salud mental bou di grandinan, nos ta boga pa inclui cuidu psicologico den e paquete basico di AZV.
- **Reduccion di Listanan di Espera pa Cuponan di Cuido:** Riba termino cortico nos kier pone mas cama disponibel den institutonan di cuidu pa reduci e listanan di espera largo drasticamente.

Cuido y Bienestar pa Nos Grandinan

- **Evaluacion di Diplomanan di Cuido:** Un comision independiente lo evalua e validez di diplomanan di personal di cuidu pa garantisa e calidad di cuidu.

3. Sosten Practico y Programanan Social

- **Programa Piloto di Enfermeria:** MAS kier establece un trayecto di educacion cortico pa enfermeronan, cu cursonan di anochi pa personanan interesa den e sector di cuidu.
- **Fisioterapia pa Grandinan:** Nos kier sigura cu tur grandinan cu mester di fisioterapia por ricibi e cuidu aki.
- **Actividadnan Social den Centronan di Barrio:** Den cooperacion cu centronan di barrio nos kier organisa actividadnan diario pa grandinan, manera charla, programanan di movecion y encuentronan social.


4. Medidanan di Sosten Specifico

- **Ley di Cuido di Grandinan:** MAS kier introduci un ley cu ta regula tur aspecto di cuidu di grandinan, cu atencion special pa cuidu digno y respetuoso.
- **Subsidio pa Cuido di Dia y Alpha Hulp:** Sosten financiero pa cuidu di dia y Alpha Hulp pa grandinan vulnerabel, pa nan por haya e cuidu cu nan mester.
- **Cuido Medico na Cas:** Hunto cu AZV nos kier regla pa dokternan di cas, geriatra y specialistanan ofrece cuidu medico na cas na grandinan cu no por bay consulta.
- **Dokter di Cas pa Casnan di Cuido Priva:** Cada cas di cuidu priva mester tin acceso na un dokter di cas, pa asina filenan medico wordo manteni y cuidu wordo garantisa.
- **Aumento di Subsidionan Social:** MAS ta boga pa un aumento di subsidio pa mehora e situacion financiero di grandinan.
- **Fondo di Solidaridad pa Grandinan:** Nos kier establece un fondo di solidaridad unda dunadonan di trabou y trahadonan ta contribui pa sostene e cuidu di grandinan financieramente.

Cuido y Bienestar pa Nos Grandinan

- **Loket di Sosten y Keho pa Cuido di Grandinan na Cas:** Establece loketnan pa sosten di dunadonan di cuido informal (mantelzorgers) y un punto di keho pa eventual maltrato di grandinan.

Cu e medidanan aki, MAS kier percura pa un bida digno, saludabel y sigur pa tur nos grandinan. Hunto nos ta construi un sociedad unda grandinan ta sinti nan mes aprecia y sostene.



Cuido y Bienestar di Nos Animalnan

Partido MAS ta para pa bienestar di tur nos animalnan y mascotanan unda cu actualmente e situacion a bay completamente for di man.

Gobierno mester reenforza e iniciativanan cu e fundacionnan a tuma pa sterilisa y castra cachonan y pushinan pa asina cuminsa baha e sobrepoblacion di pushi cu cacho riba caya.


Ta importante pa haci registracion di animalnan obligatorio y facilita microchipping tambe y asina crea un database central. Di e forma aki por haya mascotanan perdi mas liher bek pero tambe por hala atencion di e doñonan ora algo bay robes. E leyman actual hopi bes ta pa coregi y castiga doñonan di mascota pero mester reenforza e leyman y aumenta multanan pa asina por persegui abusadornan di animalnan cu man fuerte di ley.

Abusadornan ta esnan cu ta maltrata bestia conscientemente y a proposito. Aki ta papia e.o di venena bestianan riba caya, hinca, tira, horca, kima cu awa y zeta cayente, viola sexualmente etc. cualnan ta sosodiendo na Aruba regularmente.

Percura pa esnan cu mester traha cu e problemanan aki ta certifica y tin afinidad cu e topico y curason pa animalnan.

Mester bin cu lesnan na scolnan incorpora den e curiculo pa e muchanan por wordo educa desde hoben y tambe mester bin cu un campaña nacional cu ta informa y educa comunidad riba cuida pero tambe kico ta consecuencianan di abuso y maltrato di bestia. Por pidi companianan priva pa coopera pa duna e informacion cerca nan tambe.

Abusadornan di bestia, segun investigacionnan internacional, eventualmente lo bira abusadornan di hende tambe, pues mester corta e problema na su raiz.



Modernisacion di Enseñansa na Aruba

E sistema di enseñansa na Aruba ta luchando cu metodonan y infraestructura anticua, loke ta limita innovacion y pensamiento critico. MAS ta boga pa un sistema moderno, dirigi riba futuro cu ta stimula creatividad y ta prepara alumnonan miho pa e mundo di mañan. Aki bou nos ta presenta nos enfoque pa un sistema di enseñansa renoba.

1. Un Sistema di Enseñansa Moderno y Innovativo

- **Revisa y Modernisa:** Nos kier revisa e maneho di enseñansa pa crea un sistema innovativo cu ta cuadra cu e necesidadnan actual y futuro di alumnonan.
- **Renobacion di Scolnan:** Inverti den edificionan di scol sigur y moderno cu ta motiva alumnonan y ta ofrece un ambiente di siñamento agradabel.
- **Supervision di Calidad Constante:** Establece un team cu ta supervisa y mehora e calidad di enseñansa continuamente.
- **Scucha Alumnonan y Docentenan:** Desaroya un sistema unda feedback di alumnonan y docentenan ta wordo inclui den e mehoracion di e curiculo y e ambiente escolar.

2. Enseñansa como un Derecho Fundamental

MAS ta kere cu enseñansa ta un derecho pa tur hende, sin importa nan origen, status socio-economico of otro circunstancianan. Enseñansa ta hunga un rol importante den combati pobresa, promove husticia social y fortalece balornan democratico.

Nos Prioridadnan:

- **Accesibilidad pa Tur Alumno:** Sin importa retonan fisico, cognitivo of di migracion, tur hende mester tin acceso na enseñansa.
- **Rol Activo pa Inspeccion di Enseñansa:** Un miho control y supervision di calidad di enseñansa.
- **Fortificacion di Departamento di Leerplicht:** Preveni 'dropout' cu medidanan efectivo.

Modernisacion di Enseñansa na Aruba

- **Miho Deteccion y Prevencion di 'dropout':** Den cooperacion cu partnernan nos ta busca solucionnan pa reduci 'dropout'.
- **Flexibilisa e Curiculo:** Hunto cu stakeholders nos kier haci e curiculo flexibel y relevante pa e sociedad moderno.
- **Digitalisacion di Enseñansa:** Un cuadro nacional pa habilidadnan digital y acceso na recursonan digital.

3. Sosten y Facilidanan pa Alumnonan

- **Salud y Bienestar:** Nos kier subsidia programanan cu ta enfoca riba e salud y bienestar di alumnonan.
- **Sistema di Enseñansa Hibrido:** Pa Enseñansa Profesional Intermedio (EPI) nos ta introduci un sistema hibrido pa reduci 'dropout'.
- **Programanan di Desayuno:** Den cooperacion cu sector priva nos ta inicia un proyecto piloto pa desayunonan escolar na scolnan preparatorio y primario.
- **Mas Enfasis riba Arte y Cultura:** Arte y cultura ta haya un luga prominente den tanto scolnan basico como secundario.
- **Miho Evaluacion di Alumnonan:** Menos enfasis riba testnan, mas atencion pa evaluacionnan formativo pa desaroya talentonan.

4. Mehoracion di Cuido y Sosten den Enseñansa

- **Mehora Sistema di Cuido:** Den cooperacion cu DAS nos ta percura pa subsidionan husto pa famianan cu entrada abou.
- **Acceso na Internet:** Sigura acceso na internet pa tur alumno.
- **Actividadnan Extracurricular:** Organisa actividadnan despues di scol manera deporte, arte y guia di estudio.
- **Aumenta Capacidad Despues di Scol:** Aumenta e capacidad di cuido y actividadnan despues di scol.

5. Docentenan y Profesionalisacion

- **Salarionan Mas Halto:** Implementacion acelera di e restructuracion di salarionan di docente.

Modernisacion di Enseñansa na Aruba

- **Normjaartaak' pa Docentenan:** Hunto cu stakeholders investiga con docentenan por organisa nan trabou optimalmente, cu atencion pa duna les, preparacion, evaluacion y bienestar.

6. Salud Mental den Enseñansa

- **Coordinacion di Cuido di Salud Mental:** Miho cooperacion entre departamentonan cu ta ocupa nan mes cu e salud mental di alumnonan.
- **Mas Profesional:** Mas ayudo specialisa pa alumnonan y docentenan.
- **Registro Central di Casonan:** Un sistema digital pa registra y sigui peticionnan di ayudo.
- **Ayudo Mas Rapido:** Temponan di espera mas cortico pa alumnonan cu mester di ayudo.

7. Enseñansa pa Adulto

- **Nivel Mas Halto di Enseñansa pa Adulto:** Mehora programanan di enseñansa pa adulto na OAA.
- **Plan Sostenibel pa Educacion di Adulto:** Desaroya plannan cu ta yuda adultonan mehora nan habilidadnan y desaroya nan mes mas aleu.
- **Plan di enseñansa sostenibel pa presonan:** Desaroya plannan di enseñansa pa educacion di presonan pa percura pa un miho integracion despues di nan periodo di detencion.

Cu e plannan aki, MAS kier hiba enseñansa na Aruba na un nivel mas halto. Door di inverti den metodonan moderno, miho sosten y accesibilidad pa tur hende, nos ta construi un sociedad mas fuerte unda tur hende ta haya e oportunidad pa crece y contribui.



Cultural Mosaic
Photography by Nelson Weston, ca. 1941. San Antonio, Austin
The picture captures the diverse cultural heritage of the region, showing men from various backgrounds working together in a common endeavor.

Flow of History
Flujo de Historia
This section explores the historical and cultural influences that have shaped the region, from early settlement to modern development.

Resistencia di Medio Ambiente y Sostenibilidad

E ecosistema di Aruba ta sumamente vulnerabel y ta bou di hopi presion. Nos naturalesa ta di vital importancia pa tanto turismo como nos economia, pero hopi biaha e ta wordo lubida of no ta wordo proteha suficientemente. MAS kier fortifica e resistencia di nos medio ambiente natural pa conserva biodiversidad y sostene actividadnan economico sostenibel. Ata nos vision y plan di accion:

1. Proteccion di Medio Ambiente cu Cooperacion

Grupo di Trabou di Stakeholders: Nos kier establece un grupo di trabou cu representanten di gobierno, organisacionnan no-gubernamental, negoshinan local y lidernan comunitario. Hunto nan lo determina e prioridadnan y strategianan principal pa proteha nos medio ambiente miho. Door di traha hunto nos por reacciona mas efectivamente riba e retonan cu nos naturalesa ta confronta.

2. Leynan Ambiental Mas Fuerte

Proteccion di Ecosistemanan: MAS ta boga pa introduccion di legislacion cu ta ofrece proteccion legal na nos recursonan natural. Door di duna nos ecosistemanan derechonan, nos por sigura cu futuro generacionnan por disfruta di un medio ambiente saludabel. E leyman aki mester ofrece proteccion concreto contra agotamento y abuso di nos naturalesa.

3. Investigacion y Desaroyo Sostenibel

Cooperacion cu Institucionan di Enseñansa y Partnernan Internacional: Nos kier coopera cu universidadnan, institucionan academico y partnernan internacional pa haci investigacion riba solucionnan sostenibel. E meta ta pa balansa crecemento economico cu conservacion di medio ambiente, pa asina nos recursonan natural no wordo agota, pero wordo fortifica pa futuro.

Resistencia di Medio Ambiente y Sostenibilidad

4. Turismo Sostenibel

Proteccion di Recursonan Natural: Pa reduci e presion di turismo riba nos recursonan natural, MAS ta boga pa un limitacion di e cantidad di turista y pa certificacionnan ecologico mas estricto pa hotelnan. Institutonan di turismo mester contribui na proyectonan di recuperacion pa areanan natural cu a wordo afecta pa turismo. Esaki ta proteha loke ta haci nos isla unico y ta sigura crecemento sostenibel.

Nos Meta

MAS kier construi un Aruba sostenibel unda crecemento economico ta bay man den man cu conservacion di nos naturalesa. Nos mester proteha nos ecosistema vulnerabel door di esfuersonan conhunto, leynan fuerte y solucionnan innovativo cu ta haci uzo sostenibel di nos recursonan natural posibel. Hunto nos ta percura pa un futuro unda tanto medio ambiente como economia ta prospera.



Diversificacion Economico y Turismo

Aruba ta fuertemente dependiente di e sector turistico, loke a trece hopi beneficio pa e economia, pero tambe ta trece problemanan social y ambiental cune. Pa garantiza e prosperidad di e isla riba termino largo, MAS kier dedica su mes na un base economico mas amplio. Esaki nos ta haci door di enfoca riba diversificacion y uzo di data y investigacion como guia pa desaroyo di sectornan nobo.

1. Di Turismo pa Innovacion y Investigacion

Establecimiento di un Ministerio di Investigacion y Desaroyo: MAS ta propone pa transforma e Ministerio di Turismo den un Ministerio di Investigacion y Desaroyo. E ministerio nobo aki lo enfoca riba investigacion, innovacion y estimulacion di industrianan nobo cu ta contribui na e economia di Aruba. Asina ta crea menos dependencia di turismo y ta surgi espacio pa crecemento sostenibel.

2. Baloracion di Factornan Ambiental y Social

Investigacion di Balornan di Aruba: Nos kier investiga cua balornan ambiental y social ta di gran importancia pa Aruba y integra esakinan den futuro plannan pa desaroyo economico. E conservacion di nos structuranan natural y social unico mester hunga un rol importante den e crecemento economico.

3. Cooperacion cu Universidad di Aruba

Desaroyo di Progranmanan di Investigacion: Hunto cu Universidad di Aruba, MAS kier desaroya programanan cu ta enfoca riba desaroyo sostenibel, fortificacion di e resistencia di medio ambiente y mehoracion di e bienestar social. E cooperacion aki lo conduci na desaroyo di conocimiento y solucionnan practico pa e retonan cu nos isla ta confronta.

Diversificacion Economico y Turismo

4. Un Modelo Economico Basa riba Data

Uzo di Data pa Desaroyo: MAS kier implementa un modelo economico basa riba investigacion y data. E modelo aki lo sirbi como guia pa desaroyo di sectornan nobo manera energia renobabel, tecnologia y agricultura. Door di tuma decisionnan basa riba data, nos ta sigura cu crecemento economico ta sostenibel, eficiente y dirigi riba exito a largo plaso.

5. Telecomunicacion y Tecnologia:

MAS ta boga pa un mercado di telecomunicacion moderno y competitivo unda innovacion ta central. Nos kier:

- **Apertura pa Participantenan Nobo:** Permitsi entrada di companianan di tecnologia y IT nobo riba localidadnan re-desaroya manera e tereno di e refineria, cu inversionnan den rednan di fibra optico.
- **Miho Acceso y Redundancia:** Participantenan nobo mag di pone conexionnan di fibra pa aumenta competencia, baha gastonan y mehora e confiabilidad di e conexionnan.

Nos Meta

MAS ta boga pa un futuro unda Aruba ta menos dependiente di turismo y tin un base economico amplio basa riba innovacion, sostenibilidad y proteccion di nos balornan natural y social. Door di inverti den investigacion, cooperacion y crecemento basa riba data, nos ta crea oportunidad pa tur hende riba Aruba y ta garantisa prosperidad pa e siguiente generacionnan.

Profesionalismo den Instancianan Gubernamental

MAS ta mira e importancia di un gobierno fuerte, profesional y eficiente cu ta merece e confiansa di ciudadanonan. Lamentablemente, un falta di desaroyo profesional den institucionan gubernamental a conduci na un eficiencia mas abou y un disminucion di e confiansa. Pa restaura esaki, MAS ta enfoca riba desaroyo y mehoracion continuo di e habilidadnan di funcionarionan publico.

1. Mehoracion di Habilidadnan y Competencianan

- **Identifica Falta di Conocemento:** Nos kier ehecuta un evaluacion pa determina unda tin un deficiencia di conocimiento y habilidadnan, specialmente den funcionnan critico den gobierno.
- **Strategia pa Desaroyo di Personal:** MAS ta boga pa un strategia amplio dirigi riba training, desaroyo di liderazgo y mehoracion di prestacion pa tur trahado di gobierno. Asina nos ta segura cu nan ta mas capacita pa eherce nan trabou.
- **Presupuesto pa Training y Workshopnan:** Mester libera un presupuesto structural pa financia trainingnan y workshopnan riba tur nivel den gobierno. Esaki ta segura cu funcionarionan publico ta haya e hermentnan y conocimiento corecto pa haci nan trabou bon.
- **Control di Calidad y Standardnan di Prestacion:** Door di evalua e prestacionnan regularmente y establece standardnan halto, nos kier aumenta productividad y mehora continuamente. Esaki ta conduci na un gobierno mas eficiente cu ta inspira mas confiansa cerca e ciudadanonan.

2. Uzo di Data Mas Eficiente

Un otro aspecto importante pa un miho gobierno ta compartimento eficiente di data. E falta di compartimento di data ta causa retraso y ineficiencia den gobierno y ta limita e progreso economico y social.

Profesionalismo den Instancianan Gubernamental

- **Ley pa Compartimento di Data:** MAS kier desaroya legislacion cu ta haci compartimento di data obligatorio entre instancianan gubernamental, companianan y otro institutonan. Esaki ta sosode cu respet pa standardnan internacional, manera GDPR (General Data Protection Regulation), pa garantisa privacidad y siguridad.
- **Alineacion cu Tratadonan Internacional:** Nos ta sigura cu nos leyman rond di data ta cuadra cu tratadonan internacional, pa asina Aruba por participa mas facilmente den cooperacionnan mundial.
- **Fortificacion di Siguridad di Data:** Datonan sensitivo mester wordo proteha, mientras cu nan ta keda accesibel pa desaroyo di maneho, investigacion y crecemento economico.
- **Investigacion y Maneho di Data:** Desaroya un plataforma pa intercambio di data entre sectornan gubernamental, institutonan di enseñansa, cuidado medico y sector priva lo yuda pa traha mas eficiente y atende problemanan miho.

3. Database Nacional pa Comisarionan

Pa garantisa profesionalismo y transparencia den funcionnan publico, MAS ta boga pa un database nacional di comisarionan. Solamente candidatonan cu ta certifica y ta cumpli cu e cualificacionnan mag di sirbi den NVnan publico. Esaki ta sigura cu funcionnan ta wordo ocupa a base di conocimiento y competencia, sin preferencianan of interesnan politico.

Nos Meta

MAS ta boga pa un gobierno cu ta traha profesional, transparente y eficiente. Door di inverti den e habilidadnan di funcionarionan publico y comparti data mas eficientemente, nos ta percura pa miho servicio, mas confiansa di e ciudadanonan y un gobierno cu realmente ta traha pa un y tur.

Empleo y Seguridad Social

Crea empleo y garantiza seguridad social ta puntonan di enfoke importante pa MAS. Nos kier sigura cu personanan cu ta depende di ayudo social no solamente ta wordo sosteni, pero tambe ta haya oportunidad pa contribui activamente na sociedad. Ademá, nos ta boga pa transparencia y profesionalismo den funcionnan publico. Ata nos proposicionnan concreto:

1. Instancia Special pa Personanan cu ta Ricibi Ayudo

MAS kier establece un entidad huridico special cu ta fungi como dunado di trabou pa personanan cu ta ricibi ayudo social. E instancia aki lo funciona como un agencia di intermediacion cu ta guia personanan cu ta ricibi ayudo pa haya trabou y ta sostiene nan den nan re-integracion. Trahadonan den e areglo aki:

- **Beneficio Fiscal pa Personanan cu ta Ricibi Ayudo:** No tin impuesto riba entrada te na e salario minimo. Riba entrada riba e salario minimo si ta cobra impuesto.
- **Estimulo pa Participacion:** E sistema aki ta ofrece incentivanan pa participacion activo den e mercado laboral, mientras cu ta mantene seguridad social.

Door di e sistema aki, nos kier stimula personanan cu un uitkering y sostiene nan den nan re-integracion den e mercado laboral.

2. Mercado Laboral y Condicionnan di Trabou

MAS ta reconoce e posicion dificil di trahadonan cu ta traha via contractnan di tercer partido, manera den hotelnan. Pa fortalece nan y garantiza miho condicionnan di trabou, nos ta propone:

- **Establecimiento di Entidadnan Cooperativo:** Trahadonan ta bira doño di un organizacion cooperativo, dunando nan acceso na contractnan laboral fiho, miho salario y condicionnan di trabou.
- **Mas Siguridad y Independencia:** Door di areglonan colectivo manera transporte y fondonan di spaar, nan ta haya mas siguridad y independencia financiero.

Empleo y Seguridad Social

3. Vivienda Pagabel

Pa sigura cu tur hende na Aruba tin acceso na vivienda pagabel, MAS kier cera un acuerdo cu FCCA pa e por cumpli miho cu su meta original: pone viviendanan disponibel pa personanan cu entrada mas abou. Ademá, nos ta boga pa fortificacion di e servicio di proteccion di consumidor (SEDECO) cu ta regula prijsnan di huur y pa cobra impuestonan adicional riba propiedadnan cumpra pa cumpradonan di afo. Esaki ta preveni scarcedad di vivienda y ta proteha e mercado local.

Den cooperacion cu stakeholders manera DIP, DOW, ELMAR, SETAR y otronan, pa facilita terenonan di construccion, plannan di parcelacion y aprobacion di materialnan di construccion alternativo pa asina logra prijsnan di huur y compra mas accesibel.

4. Condicionnan di Trabou

E mercado laboral di Aruba mester duna prioridad na trahadonan local. MAS ta compromete pa duna nan preferencia den vacaturanan y ta boga pa orarionan di trabou flexibel, bou condicion cu esakinan ta wordo fiha den consulta cu dunadonan di trabou. Asina nos ta crea un mercado laboral cu ta cuadra cu e necesidadnan di trahadonan y e economia.

5. Costo di Bida y Impuesto

MAS ta reconoce e necesidad pa mantene e costo di bida manehabel pa tur ciudadano. Aunke aumenta salario minimo ta un opcion, mester tene cuenta cu efectonan di inflacion. Nos enfoke ta riba reformanan fiscal, manera simplifica y haci e sistema di BTW mas husto, y ofrece sosten financiero adicional na gruponan vulnerabel manera pensionadonan.


- **BTW Simplifica:** Un BTW uniforme riba tur producto y servicio, incluyendo importacion, cu excepcion di necesidadnan basico esencial unda ta posibel.
- **Reduccion di Impuesto riba Ganashi:** Un tarifa fiho di 15% riba ganashi pa companianan, cu deduccionnan fuertemente limita pa preveni evasion di impuesto. Medidanan specifico ta aplicabel pa frankicianan internacional pa combati fuga di capital.

Empleo y Seguridad Social

- **Elimina Impuesto di Importacion:** Impuesto di importacion ta wordo elimina pa baha e prijs di productonan, loke ta stimula actividad economico y ta aumenta e poder di compra di e poblacion.
- **Impuesto riba Entrada Mas Sempel:** Un sistema transparente cu tarifanan abou sin deduccionnan, unda entrada bruto y contribucionnan di dunado di trabou ta wordo combina.

Nos Meta

Cu e medidanan aki, nos kier crea un mercado laboral inclusivo unda tur hende ta haya e oportunidad pa desaroya nan mes y contribui. Nos ta boga pa un reparticion husto y transparente di funcionnan den gobierno y un sistema cu ta sostene personanan pa participa activamente den sociedad atrobe. Hunto nos ta construi un Aruba mas fuerte y social.





Infraestructura Sostenibel

MAS ta comprometi na un Aruba limpi y sostenibel, unda medio ambiente ta wordo proteha y recursonan natural ta wordo uza na un manera responsabel. Esaki ta exigi medidanan efectivo pa maneho di desperdicio, implementacion di tecnologianan berde y e transicion pa energia sostenibel. Nos enfoke ta inclui e siguiente puntonan importante:

1. Maneho di Desperdicio Efectivo

E maneho corecto di desperdicio ta esencial pa mantene nos medio ambiente limpi y combati desperdicio. MAS kier:

- **Eliminacion di Desperdicio Electronico:** Introduci un sistema pa e procesamiento corecto di aparatonan electronico, pa asina substancianan dañino no termina den medio ambiente.
- **Deposito riba Boternan:** Introduci un sistema di deposito pa boternan pa stimula reciclahe y reduci desperdicio riba caya.
- **Separacion di Desperdicio y Reciclahe:** Promove separacion di desperdicio pa recicla mas material y asina reduci e cantidad di desperdicio.

2. Re-uzo Sostenibel di Tereno

- **Desmantelacion di e Refineria:** MAS kier pa e tereno di e refineria anterior wordo uza pa tecnologia berde y agricultura vertical. Esaki no solamente ta contribui na un medio ambiente mas limpi, pero tambe ta aumenta e seguridad di cuminda di Aruba door di stimula produccion local.

3. Transicion pa Energia Sostenibel

- **Energia Solar y di Biento:** Nos ta enfoca riba aumenta e uzo di energia solar y di biento pa reduci e dependencia di combustibel fosil.
- **Almacenamento di Energia Local:** Inverti den baterianan pa almacenamento di energia local, pa asina energia sostenibel por wordo uza mas eficientemente.
- **Generadornan di LPG:** Introduci generadornan di LPG como reemplaso pa LNG pa haci e produccion di energia mas ecologico.
- **Maneho di Energia Independiente:** MAS kier apunta un 'energizar' y un comision special cu ta responsabel pa e maneho di e suministro di energia, independiente di companianan di energia comercial. Esaki ta sigura un mercado di energia husto y sostenibel.

Infraestructura Sostenibel

- **Importacion di Productonan di Energia Sostenibel:** 0% impuesto di importacion riba productonan di energia manera panelnan solar y turbinanan di biento.

4. Plachinan di Number y Impuesto di Trafico

MAS ta propone pa introduci un solo plachi di number pa vehiculonan motorisa, cu stickernan anual pa mantene e registracion up-to-date. E sistema ta inclui:

- **Registracion Digital:** Stickernan anual ta wordo registra, incluyendo status di seguro y impuesto.
- **Impuesto di Caminda via BTW:** Door di cobra BTW riba combustibel, por elimina impuesto di caminda directo, loke ta reduci e gastonan administrativo.

Nos Meta

Cu e medidanan aki, MAS kier contribui na un Aruba mas limpi y sostenibel. Door di reduci desperdicio, brasa tecnologia berde y haci e transicion pa energia sostenibel, nos ta construi un futuro unda tanto medio ambiente como economia di Aruba ta prospera. Hunto nos ta compromete na un medio ambiente bibabel y saludabel pa generacionnan actual y futuro.





FOR SALE
196-4130

Agricultura Sostenibel y Suministro di Alimento pa Aruba

MAS ta compromete na un sector agricola sostenibel y resiliente na Aruba, pa asina nos reduci e dependencia di importacion y stimula produccion local. Nos meta ta alimento pagabel y di calidad halto pa tur Arubiano, cu un enfoque riba agricultura na escala chikito, maneho di awa innovativo y sosten di produccion di pisca local.

1. Cunucunan na Escala Chikito y Produccion Local

MAS ta scoge pa cunucunan na escala chikito como base di nos sector agricola. E modelo aki ta ofrece solucionnan pagabel y eficiente pa produccion di alimento local:

- **Subsidio y Acceso na Tereno:** Sosten pa agricultornan chikito cu subsidio, acceso na tereno agricola y training den tecnicanan sostenibel.
- **Produccion di Productonan Local:** Programanan pa cultivo di berdura, fruta y webo pa reduci e dependencia di importacion.

2. Uzo di Awa Sostenibel

Awa ta esencial pa agricultura na Aruba. Nos plan ta inclui:

- **Colecta y Maneho di Awa di Yobida:** Subsidio pa sistemanan di colecta di awa di yobida y miho almacenamiento pa minimalisa perdida di awa.
- **Uzo di Awa Purifica:** Promocion di uzo di awa purifica pa agricultura, loke ta baha gastonan y ta promove sostenibilidad.

3. Produccion di Pisca Local y Acuicultura

Pa un sector di pesca sostenibel y autosuficiente:

- **Criaderonan di Pisca y Training:** Estimulacion di criaderonan di pisca, por ehempel di cabaron, y programanan di training pa acuicultura sostenibel.
- **Cooperacion cu Piscadonan Local:** Sosten di e industria di pesca local den cooperacion cu piscadonan.

Agricultura Sostenibel y Suministro di Alimento pa Aruba

4. Restructuracion di DLVV y Sosten

- **Establecimiento di Departamento di Investigacion:** Enfoca riba monitoreo di suela y awa, vigilancia di malesa y maneho pa agricultura sostenibel.
- **Santa Rosa como Centro di Sosten:** Santa Rosa ta ofrece training, simiya y conocimiento pa sostene agricultornan y piscadonan.

5. Metodonan di Agricultura Sostenibel


- **Agricultura Biologico y Regenerativo:** Promocion di compost, fertilisantenan natural y educacion den tecnicanan sostenibel.
- **Estimulonan Fiscal:** Beneficianan fiscal pa iniciativanan di agricultura sostenibel.

6. Sosten Financiero y Tecnico

- **Subsidio y Micro-creditanan:** Pa sistemanan di irigacion, materialnan di agricultura y agricultornan nobo.
- **Fondo di Desaroyo di Agricultura:** Sostene proyectonan innovativo pa agricultornan na escala chikito.

Nos Meta

MAS ta construi un futuro economicamente y ecologicamente saludabel cu menos dependencia di importacion, mas produccion local y sosten di nos sector primario. Hunto nos ta traha pa un Aruba mas fuerte, unda agricultura y suministro di alimento ta sostenibel y resiliente.





Finalmente: Hunto Padilanti pa un Aruba Saludabel, Prospero y Sostenibel

Cu e plan di partido aki, nos di MAS, kier delinea un caminda cla pa un miho futuro pa un y tur riba Aruba. Nos ta para pa un sociedad unda honestidad, transparencia, sostenibilidad y igualdad social ta central. Nos meta ta pa haci Aruba mas fuerte, mas husto y mas sostenibel, unda tur habitante ta haya e oportunidad pa crece, contribui y disfruta di un bon bida.

Nos Prioridadnan Principal:

- **Salud y Bienestar:** Nos ta comprometi na cuidu medico accesibel, pagabel y di calidad, cu atencion extra pa salud mental y cuidu preventivo. Salud no ta un luho, sino un derecho.
- **Crecemento Economico Sostenibel:** Menos dependencia di un solo sector, cu enfoke riba energia renobabel, tecnologia y solucionnan innovativo. Hunto nos ta construi un economia cu ta crea oportunidad pa un y tur.
- **Proteccion di Naturalesa y Medio Ambiente:** Nos naturalesa unico merece proteccion. Leynan ambiental estricto, inversionnan den tecnologia berde y un enfoke riba sostenibilidad ta central pa ofrece futuro generacionnan un medio ambiente saludabel.
- **Transparencia y Bon Gobernacion:** Combati corrupcion, frankesa den tumamento di decision y responsabilidad di gobierno. Nos kier un gobierno honesto unda confiansa ta primordial.
- **Seguridad Social y Empleo:** Nos kier pa tur hende haya un oportunidad. Vivienda pagabel, condicionnan di trabou husto y prioridad pa empleo local ta riba nos agenda.

Hunto Construi e Futuro

Nos ta kere cu un Aruba fuerte y sostenibel no ta wordo construi solamente door di gobierno, pero door di un y tur. Hunto nos por tuma pasonan grandi pa un sociedad unda respet, igualdad y solidaridad ta e norma. Esaki ta nos plan y nos promesa na e pueblo di Aruba: un futuro husto unda ningun hende ta wordo laga atras.

Finalmente: Hunto Padilanti pa un Aruba Saludabel, Prospero y Sostenibel

Ban traha hunto pa construi un Aruba cu tur hende por ta orguyoso di dje. Hunto padilanti, pa un isla mas fuerte, mas husto y mas sostenibel.

Join nos. MAS ta cla pa hunto cu boso haci e diferencia.

Cu e mensahe aki nos ta finalisa nos plan, determina pa tuma e futuro den nos man y hunto cu e pueblo construi un miho Aruba.

drs. Marisol J. Tromp
Lider di Partido MAS



ARUBA MERECE



MOVIMIENTO ARUBANO SOBERANO

PLAN DI PARTIDO 2025 -2029
MOVIMIENTO ARUBANO SOBERANO